

通鑑紀事本末

DS
747
v. 2
S7553 Y2
1873
v. 33

EAST ASIAN LIBRARY
UNIVERSITY OF TORONTO LIBRARY,
130 St. George Street
8th FLOOR
TORONTO, CANADA M5S 1A5

University of Toronto

Library

e 403/6 v

ASIAN COLLECTION



通鑑紀事本末卷一百九

宋建安袁樞編輯

明太倉張溥論正

劉裕篡晉

晉安帝隆安三年初彭城劉裕生而母死父翹僑居京口家貧將棄之同郡劉懷敬之母裕之從母也生懷敬未朞走往救之斷懷敬乳而乳之及長勇健有大志僅識文字以賣履爲業好携菹爲鄉閭所賤劉牢之擊孫恩引裕參軍事劉裕擊孫恩事見盧循之亂元興三年桓玄之亂劉裕入朝玄謂其司徒王謐曰

裕風骨不常蓋人傑也玄后劉氏有智鑒謂玄曰劉裕龍行虎步視瞻不凡恐終不爲人下不如早除之玄曰我方平蕩中原非裕莫可用者候關河平定然後別議耳 劉裕與何無忌密謀興復劉邁弟毅亦與無忌謀討玄於是相與合謀起兵 劉裕克京口玄懼浮江南走裕入建康王謐推裕爲使持節都督揚徐兗豫青冀幽并八州諸軍事徐州刺史 玄至尋陽逼帝西上劉毅等追之玄挾帝至江陵毅等自尋陽西至與玄遇玄眾大潰挾帝西走馮遷擊斬之乘輿返正於江陵 桓振襲陷江陵

義熙元年春正月劉毅等擊破桓振軍迎帝於江陵
何無忌奉帝東還 三月帝至建康以劉裕爲侍中

車騎將軍都督中外諸軍事裕固辭不受屢請歸藩

詔百僚敦勸帝幸其第裕復詣闕陳請乃聽歸藩

並見

僞楚之亂

夏四月劉裕旋鎮京口改授都督荆司等十

六州諸軍事加領兗州刺史 六月劉裕遣使求和

於秦且求南鄉等諸郡秦王興許之羣臣咸以爲不

可興曰天下之善一也劉裕拔起細微能誅討桓玄

興復晉室內釐庶政外脩封疆吾何惜數郡不以成

其美乎遂割南鄉順陽新野舞陰等十二郡歸於晉

二年冬十月尙書論建義功奏封劉裕豫章郡公

四年春正月劉毅等不欲劉裕入輔政議以中領軍謝混爲揚州刺史或欲令裕於丹徒領揚州以內事付孟昶遣尙書右丞皮沈以二議諮裕沈先見裕記室錄事參軍劉穆之具道朝議穆之僞起如廁密疏白裕曰皮沈之言不可從裕旣見沈且令出外呼穆之問之穆之曰晉朝失政日久天命已移公興復皇祚勲高位重今日形勢豈得居謙遂爲守藩之將耶劉孟諸公與公俱起布衣共立大義以取富貴事有前後故一時相推非爲委體心服宿定臣主之分也

力敵勢均終相吞噬揚州根本所係不可假人前者以授王謐事出權道今若復以佗授便應受制於人一失權柄無由可得將來之危難可熟念今朝議如此宜相酬答必云在我措辭又難唯應云神州治本宰輔崇要此事旣大非可懸論便暫入朝共盡同異公至京邑彼必不敢越公更授餘人明矣裕從之朝廷乃徵裕爲侍中車騎將軍開府儀同三司揚州刺史錄尙書事徐兗二州刺史如故裕表解兗州以諸葛長民爲青州刺史鎮丹徒劉道憐爲并州刺史戍石頭

五年春三月劉裕伐南燕

事見劉裕平南燕

初苻氏之敗

也王猛之孫鎮惡來犇以爲臨澧令鎮惡有謀略善果斷喜論軍國大事或薦鎮惡於劉裕裕與語說之因畱宿明旦謂參佐曰吾聞將門有將鎮惡信然卽以爲中軍參軍秋九月加劉裕太尉裕固辭

六年六月以劉裕爲太尉中書監加黃鉞裕受黃鉞餘固辭司馬國璠及弟叔璠叔道奔秦秦王興曰劉裕方誅桓立輔晉室卿何爲來對曰裕削弱王室臣宗族有自脩立裕輒除之方爲國患甚於桓立耳七年春正月己未劉裕還建康三月劉裕始受太

尉中書監

八年夏四月以後將軍豫州刺史劉毅爲衛將軍都督荆寧秦雍四州諸軍事荊州刺史毅謂左衛將軍劉敬宣曰吾忝西任欲屈卿爲長史南蠻豈有見輔意乎敬宣懼以告太尉裕裕笑曰但令老兄平安必無過慮毅性剛愎自謂建義之功與裕相埒深自矜伐雖權事推裕而心不服及居方岳嘗怏怏不得志裕每柔而順之毅驕縱滋甚嘗云恨不遇劉項與之爭中原及敗於桑落知物情去已彌復憤激裕素不學而毅頗涉文雅故朝士有清望者多歸之與尙書

僕射謝混丹陽尹郗僧施深相憑結僧施超之從子也毅旣據上流陰有圖裕之志求兼督交廣二州裕許之毅又奏以郗僧施爲南蠻校尉後軍司馬毛脩之爲南郡太守裕亦許之以劉穆之代僧施爲丹陽尹毅表求至京口辭墓裕往會之於倪塘寧遠將軍胡藩言於裕曰公謂劉衛軍終能爲公下乎裕默然久之曰卿謂何如藩曰連百萬之眾攻必取戰必克毅固以此服公至於涉獵傳記一談一詠自許以爲雄豪以是搢紳白面之士輻輳歸之恐終不爲公下不如因會取之裕曰吾與毅俱有克復之功其過未

彰不可自相圖也 秋九月劉毅至江陵多變易守

宰輒割豫州文武江州兵力萬餘人以自隨會毅疾篤郗僧施等恐毅死其黨危乃勸毅請從弟兖州刺史藩以自副太尉裕僞許之藩自廣陵入朝己卯裕以詔書罪狀毅云與藩及謝混共謀不軌收藩及混賜死庚辰詔大赦以前會稽內史司馬休之爲都督荆雍梁秦寧益六州諸軍事荊州刺史北徐州刺史劉道憐爲兗青二州刺史鎮京口使豫州刺史諸葛長民監太尉畱府事裕疑長民難獨任乃加劉穆之建武將軍置佐吏配給資力以防之壬午裕帥諸軍

發建康參軍王鎮惡請給百舸爲前驅丙申至姑孰以鎮惡爲振武將軍與龍驤將軍蒯恩將百舸前發裕戒之曰若賊可擊擊之不可者燒其船艦畱屯水際以待我於是鎮惡晝夜兼行揚聲言劉兖州至冬十月己未鎮惡至豫章口去江陵城二十里捨船步上蒯恩軍居前鎮惡次之舸畱一二人對舸岸上立六七旗旗下置鼓語所畱人計我將至城便鼓嚴令若後有大軍狀又分遣人燒江津船艦鎮惡徑前襲城語前軍士有問者但云劉兖州至津戍及民間皆晏然不疑未至城五六里逢毅要將朱顯之欲出江

津問劉兗州何在軍士曰在後顯之至軍後不見藩
而見軍人擔彭排戰具望江津船艦已被燒鼓嚴之
聲甚盛知非藩上便躍馬馳去告毅行令閉諸城門
鎮惡亦馳進門未及下關軍人因得入城衛軍長史
謝純入參承毅出聞兵至左右欲引車歸純叱之曰
我人吏也逃將安之馳還入府純安兄據之孫也鎮
惡與城內兵鬪且攻其金城自食時至中晡城內人
敗散鎮惡穴其金城而入遣人以詔及赦文并裕手
書示毅毅皆燒不視與司馬毛脩之等督士卒力戰
城內人猶未信裕自來軍士從毅自東來者與臺軍

多中表親戚且鬪且語知裕自來人情離駭逮夜聽
事前兵皆散斬毅勇將趙蔡毅左右兵猶閉東西閣
拒戰鎮惡慮閣中自相傷犯乃引軍出圍金城開其
南面毅慮南有伏兵夜半帥左右三百許人開北門
突出毛脩之謂謝純曰君但隨僕去純不從爲人所
殺毅夜投牛牧佛寺初桓蔚之敗也走投牛牧寺僧
昌昌保藏之毅殺昌至是寺僧拒之曰昔亡師容桓
蔚爲劉衛軍所殺今實不敢容異人毅歎曰爲法自
弊一至於此遂縊而死明日居人以告乃斬首於市
并子姪皆伏誅毅兄模犇襄陽魯宗之斬送之初毅

季父鎮之間居京口不應辟召嘗謂毅及藩曰汝輩才器足以得志但恐不久耳我不就爾求財位亦不同爾受罪累每見毅藩導從到門輒詬之毅甚敬畏未至宅數百步悉屏儀衛與白衣數人俱進及毅死太尉裕奏徵鎮之爲散騎常侍光祿大夫固辭不至冬十一月己卯太尉裕至江陵殺郗僧施初毛脩之雖爲劉毅僚佐素自結於裕故裕特宥之賜王鎮惡爵漢壽子裕問毅府諮議參軍申永曰今日施而可永曰除其宿釁倍其惠澤貫敘門次顯擢才能如此而已裕納之下書寬租省調節役原刑禮辟名

士荆人說之 諸葛長民驕縱貪侈所爲多不法爲
百姓患嘗懼太尉裕按之及劉毅被誅長民謂所親
曰昔年醢彭越今年殺韓信禍其至矣乃屏人問劉
穆之曰悠悠之言皆云太尉與我不平何以至此穆
之曰公沂流遠征以老母稚子委節下若一毫不盡
豈容如此邪長民意乃小安長民弟輔國大將軍黎
民說長民曰劉氏之亡亦諸葛氏之懼也宜因裕未
還而圖之長民猶豫未發旣而歎曰貧賤常思富貴
富貴必履危機今日欲爲丹徒布衣豈可得邪因遺
冀州刺史劉敬宣書曰盤龍很戾專恣自取夷滅異

端將盡世路方夷富貴之事相與共之敬宣報曰下
官自義熙以來忝三州七郡常懼福過災生思避盈
居損富貴之旨非所敢當且使以書呈裕裕曰阿壽
故爲不負我也裕在江陵輔國將軍王誕白裕求先
下裕曰諸葛長民似有自疑心卿詎宜便去誕曰長
民知我蒙公垂眄今輕身單下必當以爲無虞乃可
以少安其意耳裕笑曰卿勇過賁育矣乃聽先還
冬十二月加太尉裕太傅揚州牧
九年春二月太尉裕自江陵東還駱驛遣輜重兼行
而下前刻至日每淹畱不進諸葛長民與公卿頻日

奉候於新亭輒差其期乙丑晦裕輕舟徑進潛入東
府三月丙寅朔旦長民間之驚趨至門裕伏壯士丁
眡於幔中引長民卻人閑語凡平生所不盡者皆及
之長民甚悅丁眡自幔後出於座拉殺之輿尸付廷
尉收其弟黎民黎民素驍勇格鬪而死并殺其季弟
大司馬參軍幼民從弟寧朔將軍秀之 戊寅加裕
豫州刺史裕固讓太傅州牧 秋九月再命太尉裕
爲太傅揚州牧固辭

十年司馬休之在江陵頗得江漢民心子譙王文思
在建康性凶暴好通輕俠太尉裕惡之三月有司奏

文思擅捶殺國吏詔誅其黨而宥文思休之上疏謝
罪請解所任不許裕執文思送休之令自訓厲意欲
休之殺之休之但表廢文思并與裕書陳謝裕由是
不悅以江州刺史孟懷玉兼督豫州六郡以備之

十一年春正月太尉裕收司馬休之次子文寶兄子
文祖並賜死發兵擊之詔加裕黃鉞領荊州刺史庚
午大赦 辛巳太尉裕發建康以中軍將軍劉道憐
監留府事劉穆之兼右僕射事無大小皆決於穆之
又以高陽內史劉鍾領石頭戍事屯冶亭休之府司
馬張裕南平太守檀範之聞之皆逃歸建康裕邵之

兄也雍州刺史魯宗之自疑不爲太尉裕所容與其
子竟陵太守軌起兵應休之二月休之上表罪狀裕
勒兵拒之裕密書招休之府錄事參軍南陽韓延之
延之復書曰承親帥戎馬遠履西畿闔境士庶莫不
惶駭辱疏知以譙王前事良增歎息司馬平西體國
忠貞款懷待物以公有匡復之勳家國蒙賴推德委
誠每事詢仰譙王往以微事見劾猶自表遜位況以
大過而當默然邪前以表奏廢之所不盡者命耳推
寄相與正當如此而遽興兵甲所謂欲加之罪其無
辭乎劉裕足下海內之人誰不見足下此心而復欲

欺誑國士來示云虛懷期物自有由來今伐人之君
啗人以利真可謂虛懷期物自有由來者乎劉藩死
於閭闔之門諸葛斃於左右之手甘言詫方伯襲之
以輕兵遂使席上靡款懷之士閭外無自信諸侯以
是爲得算良可恥也貴府將佐及朝廷賢德寄命過
日吾誠鄙劣嘗聞道於君子以西平之至德寧可無
授命之臣乎必未能自投虎口比迹郗僧施之徒明
矣假令天長喪亂九流渾濁當與臧洪遊於地下不
復多言裕視書歎息以示將佐曰事人當如此矣延
之以裕父名翹字顯宗乃更其字曰顯宗名其子曰

翹以示不臣劉氏 太尉裕使參軍檀道濟朱超石將步騎出襄陽超石齡石之弟也江夏太守劉虔之將兵屯三連立橋聚糧以待道濟等積日不至魯軌襲擊虔之殺之裕使其壻振威將軍東海徐達之統參軍蒯恩王允之沈淵子爲前鋒出江夏口達之等與魯軌戰於破冢兵敗達之允之淵子皆死獨蒯恩勒兵不動軌乘勝力攻之不能克乃退淵子林子之兄也裕軍於馬頭聞達之死怒甚三月壬午帥諸將濟江魯軌司馬文思將休之兵四萬臨峭岸置陳軍士無能登者裕自被甲欲登諸將諫不從怒愈甚太

尉主簿謝晦前抱持裕裕抽劍指晦曰我斬卿晦曰
天下可無晦不可無公建武將軍胡藩領遊兵在江
津裕呼藩使登藩有疑色裕命左右錄來欲斬之藩
顧曰正欲擊賊不得奉教乃以刀頭穿岸劣容足指
騰之而上隨之者稍多旣登岸直前力戰休之兵不
能當稍引卻裕兵因而乘之休之兵大潰遂克江陵
休之宗之俱北走軌畱石城裕命閬中侯下邳趙倫
之太尉參軍沈林子攻之遣武陵內史王鎮惡以舟
師追休之等 青冀二州刺史劉敬宣參軍司馬道
賜宗室之疏屬也聞太尉裕攻司馬休之道賜與同

府辟閭道秀左右小將王猛子謀殺敬宣據廣固以應休之乙卯敬宣召道秀屏人語左右悉出戶猛子逡巡在後取敬宣備身刀殺敬宣文武佐吏卽時討道賜等皆斬之夏五月趙倫之沈林子破魯軌於石城司馬休之魯宗之救之不及遂與軌犇襄陽宗之參軍李應之閉門不納甲午休之宗之軌及譙王文思新蔡王道賜梁州刺史馬敬南陽太守魯範俱犇秦宗之素得士民心爭爲之衛送出境王鎮惡等追之盡境而還初休之等求救於秦魏秦征虜將軍姚成王及司馬國璠引兵至南陽魏長孫嵩至河東

聞休之等敗皆引還休之至長安秦王興以爲揚州
刺史使侵擾襄陽侍御史唐盛言於興曰據符讖之
文司馬氏當復得河雒今使休之擅兵於外猶縱魚
於淵也不如以高爵厚禮畱之京師興曰昔文王卒
免姜里高祖不斃鴻門苟天命所在誰能違之脫如
符讖之言畱之適足爲害遂遣之詔加太尉裕太
傅揚州牧劍履上殿入朝不趨贊拜不名秋八月
甲子太尉裕還建康固辭太傅州牧其餘受命
十二年春正月加太尉裕兗州刺史都督南秦州凡都督
二十二州三月加太尉裕中外大都督裕戒嚴將

伐秦詔加裕領司豫二州刺史。夏五月癸巳加太尉裕領北雍州刺史。秋八月太尉裕以世子義符爲中軍將軍監太尉留府事劉穆之爲左僕射領監軍中軍二府軍司入居東府總攝內外。丁巳裕發建康。冬十一月太尉裕遣左長史王弘還建康諷朝廷求九錫時劉穆之掌留任而旨從北來穆之由是愧懼發病弘珣之子也。十二月壬申詔以裕爲相國總百揆揚州牧封十郡爲宋公備九錫之禮位在諸侯王上領征西將軍司豫北徐雍四州刺史如故裕辭不受。

十三年春正月太尉裕引水軍發彭城 三月太尉裕將水軍自淮泗入清河將沂河西上先遣使假道於魏魏人以數千騎隨裕軍西行裕遣兵擊之魏軍犇潰 秋八月太尉裕至潼關王鎮惡大破秦兵於渭橋姚泓將妻子羣臣詣鎮惡降九月裕至長安以秦金玉繒帛頒賜將士送姚泓至建康斬之事見劉裕滅後秦 癸酉司馬休之司馬文思司馬國璠司馬道賜魯軌韓延之等皆降於魏司馬休之尋卒魏賜國璠爵淮南公道賜爵池陽子魯軌爵襄陽公 冬十月詔進宋公爵爲王增封十郡辭不受 十一月辛未

劉穆之卒太尉裕以根本無託決意東還 十二月
庚子太尉裕發長安

十四年春正月太尉裕至彭城解嚴 夏六月太尉

裕始受相國宋公九錫之命赦國中殊死以下崇繼
母蘭陵蕭氏爲太妃以太尉軍咨祭酒孔靖爲宋國
尙書令左長史王弘爲僕射領選從事中郎傅亮蔡
廓皆爲侍中謝晦爲右衛將軍右長史鄭鮮之爲奉
常行參軍殷景仁爲祕書郎其餘百官悉依天朝之
制靖辭不受亮咸之孫廓謨之曾孫鮮之渾之玄孫
景仁融之曾孫也景仁學不爲文敏有思致口不談

義深達理體至於國典朝儀舊章記注莫不撰錄識者知其有當世之志 冬十二月彗星出天津入太微經北斗絡紫微八十餘日而滅魏主嗣復召諸儒術士問之曰今四海分裂災咎之應果在何國朕甚畏之卿輩盡言勿有所隱眾推崔浩使對浩曰夫災異之興皆象人事人苟無釁又何畏焉昔王莽將篡漢彗星出入正與今同國家主尊臣卑民無異望晉室陵夷危亡不遠彗之爲異其劉裕將篡之應乎眾無以易其言 宋公裕以讖云昌明之後尙有三帝乃使中書侍郎王韶之與帝左右密謀酖帝而立琅

邪王德文德文常在帝左右飲食寢處未嘗暫離韶之伺之經時不得間會德文有疾出居於外戊寅韶之以散衣縊帝於東堂韶之廩之曾孫也裕因稱遣韶奉德文卽皇帝位大赦

恭帝元熙元年春正月甲午徵宋公裕入朝進爵爲王裕辭初司馬楚之奉其父榮期之喪歸建康會宋公裕誅翦宗室之有才望者楚之叔父宣期兄貞之皆死楚之亡匿竟陵蠻中及從祖休之自江陵犇秦楚之亡之汝潁間聚眾以謀復讐楚之少有英氣能折節下士有眾萬餘屯據長社裕使刺客沐謙往

刺之楚之待謙甚厚謙欲發未得間乃夜稱疾知楚之必往間疾因欲刺之楚之果自齋湯藥往視之情意勤篤謙不忍發乃出匕首於席下以狀告之曰將軍深爲劉裕所忌願勿輕率以自保全遂委身事之爲之防衛時宗室多逃亡在河南有司馬文榮者帥乞活千餘戶屯金墉城南又有司馬道恭自東垣帥三千人屯城西司馬順明帥五千人屯陵雲臺司馬楚之屯柏谷塢皆降於魏秋七月宋公裕始受進爵之命八月移鎮壽陽以度支尙書劉懷慎爲督淮北諸軍事徐州刺史鎮彭城九月宋王裕自解揚

州牧 冬十二月辛卯宋王裕加殊禮進王太妃爲
太后世子爲太子

宋高祖永初元年春正月宋王欲受禪而難於發言
乃集朝臣宴飲從容言曰桓立篡位鼎命已移我首
唱大義興復帝室南征北伐平定四海功成業著遂
荷九錫今年將衰暮崇極如此物忌盛滿非可久安
今欲奉還爵位歸老京師羣臣惟盛稱功德莫喻其
意日晚坐散中書令傅亮還外乃悟而宮門已閉亮
叩扉請見王卽開門見之亮入但曰臣暫宜還都王
解其意無復他言直云須幾人自送亮曰數十人可

也卽時奉辭亮出已夜見長星竟天拊髀歎曰我嘗不信天文今始驗矣亮至建康 夏四月徵王入輔王畱子義康爲都督豫司雍并四州諸軍事豫州刺史鎮壽陽義康尙幼以相國參軍南陽劉湛爲長史決府州事湛自弱年卽有宰物之情常自比管葛博涉書史不爲文章不喜談議王甚重之 夏六月壬戌王至建康傅亮諷晉恭帝禪位於宋具詔草呈帝使書之帝欣然操筆謂左右曰桓立之時晉氏已無天下重爲劉公所延將二十載今日之事本所甘心遂書赤紙爲詔甲子帝遜於琅邪第百官拜辭祕書

監徐廣流涕哀慟丁卯王爲壇於南郊卽皇帝位禮畢自石頭備法駕入建康宮徐廣又悲感流涕侍中謝晦謂之曰徐公得無小過廣曰君爲宋朝佐命身是晉室遺老悲歡之事固不可同廣邈之弟也帝臨太極殿大赦改元其犯鄉論清議一皆蕩滌與之更始

裴子野論曰昔重華受終四凶流放武王克殷頑民遷雒天下之惡一也鄉論清議除之過矣

奉晉恭帝爲零陵王優崇之禮皆倣晉初故事卽宮於故秣陵縣使冠軍將軍劉遵考將兵防衛降褚后

爲王妃追尊皇考爲孝穆皇帝皇妣趙氏爲孝穆皇后尊王太后蕭氏爲皇太后上事蕭太后素謹及卽位春秋已高每旦入朝太后未嘗失時刻詔晉氏封爵當隨運改獨置始興廬陵始安長沙康樂五公降爵爲縣公及縣侯以奉王導謝安溫嶠陶侃謝玄之祀其宣力義熙豫同艱難者一仍本秩庚午以司空道憐爲太尉封長沙王追封司徒道規爲臨川王以道憐子義慶襲其爵其餘功臣徐羨之等增位進爵各有差追封劉穆之爲南康郡公王鎮惡爲龍陽縣侯上每歎念穆之曰穆之不死當助我治天下可謂

人之云亡邦國殄瘁又曰穆之死人輕易我立皇子
桂陽公義真爲廬陵王彭城公義隆爲宜都王義康
爲彭城王己卯改泰始歷爲永初歷 秋八月辛未
追謚妃臧氏爲敬皇后立王太子義符爲皇太子

二年 初帝以毒酒一罌授前琅邪郎中令張偉使
酖零陵王偉歎曰酖君以求生不如死乃於道自飲
而卒偉邵之兄也太常褚秀之侍中褚淡之皆王之
妃兄也王每生男帝輒令秀之兄弟方便殺之王自
遜位深慮禍及與褚妃共處一室自煮食於牀前飲
食所資皆出褚妃故宋人莫得伺其隙九月帝令淡

之與兄右衛將軍叔度往視妃妃出就別室相見兵人踰垣而入進藥於王王不肯飲曰佛教自殺者不復得人身兵人以被掩殺之帝帥百官臨於朝堂三日

張溥曰宋武性不信奇怪既貴史官審問微時符瑞拒而不答及不豫羣臣請禱上下神祇謝弗應其豁達大度亦沛公匹也然竹林龍章新洲杵臼史書誑耀甚於赤帝孔恭占其墓地非常帝心內喜韋叟相而言中用領軍佐不負信桐葉迨受禪勸進言天文符應者數十駱達釋

法稱辭論尤鑿若劉季卯金光武赤符持之有
故凡人貧賤好奇異富貴惡不祥始所慕說冀
惑世眾久而厭之卽謂近巫鬼不可示子孫則
絕口不欲言常情然也帝令王韶之弑晉安帝
於東堂其時可以郊壇卽位又遲不取復立恭
帝廢而弑之一人殺二主其情不忤謂應昌明
二帝之讖夫大逆不再再則有憂亂臣賊子猶
震而懼焉王莽弑平帝不殺孺子嬰司馬昭弑
高貴鄉公其子炎不殺陳畱王璜宋武效而甚
之竟以安恭厭讖芒刃再見欲後昆長世難矣

劉毅與諸葛長民帝所忌也司馬休之晉宗室之強者也毅敗於王鎮惡長民死於丁旼休之爲胡藩所逐北走入秦奸雄之盜人國也去其異已傷其本枝然後次以及君帝蓋工其術者也漢高用兵久善殺功臣宋武久習兵則善弑人主兵不可試如是夫

通鑑紀事本末卷一百九

通鑑紀事本末卷一百十

宋

建

安

袁

樞

編

輯

明

太

倉

張

溥

論

正

元魏寇宋

晉安帝義熙十三年夏五月乙未齊郡太守王懿降於魏上書言劉裕在洛宜發兵絕其歸路可不戰而克魏主嗣善之崔浩侍講在前嗣問之曰劉裕伐姚泓果能克乎對曰克之嗣曰何故對曰昔姚興好事虛名而少實用子泓懦而多病兄弟乖爭裕乘其危兵精將勇何故不克嗣曰裕才何如慕容垂對曰勝

之垂藉父兄之資脩復舊業國人歸之若夜蟲之就
火少加倚仗易以立功劉裕奮起寒微不階尺土討
滅桓玄興復晉室北禽慕容超南梟盧循所向無前
非其才之過人安能如是乎嗣曰裕旣入關不能進
退我以精騎直擣彭城壽春裕將若之何對曰今西
有屈丐北有柔然窺伺國隙陛下旣不可親御六師
雖有精兵未睹良將長孫嵩長於治國短於用兵非
劉裕敵也興兵遠攻未見其利不如且安靜以待之
裕克秦而歸必篡其主關中華戎雜錯風俗勁悍裕
欲以荆揚之化施之函秦此無異解衣包火張羅捕

虎雖畱兵守之人情未洽趨尙不同適足爲寇敵之資耳願陛下按兵息民以觀其變秦地終爲國家之有可坐而守也嗣笑曰卿料之審矣浩曰臣嘗私論近世將相之臣若王猛之治國苻堅之管仲也慕容恪之輔幼主慕容暉之霍光也劉裕之平禍亂司馬德宗之曹操也嗣曰屈丐何如浩曰屈丐國破家覆孤子一身寄食姚氏受其封殖不思酬恩報義而乘時徼利盜有一方結怨四隣擷豎小人雖能縱暴一時終當爲人所吞食耳嗣大悅語至夜半賜浩御縹醪十觚水精鹽一兩曰朕味卿言如此鹽酒故欲與

卿共饗其美然猶命長孫嵩叔孫建各簡精兵伺裕西過自成臯濟河南侵彭沛若不時過則引兵隨之宋高祖永初三年 初魏主聞高祖克長安大懼遣使請和自是每歲交聘不絕及高祖殂殿中將軍沈範等奉使在魏還及河魏主遣人追執之議發兵取洛陽虎牢滑臺崔浩諫曰陛下不以劉裕歟起納其使貢裕亦敬事陛下不幸今死遽乘喪伐之雖得之不足爲美且國家今日亦未能一舉取江南也而徒有伐喪之名竊爲陛下不取臣謂宜遣人弔祭存其孤弱恤其凶災使義聲布於天下則江南不攻自服

矣況裕新死黨與未離兵臨其境必相帥拒戰功不可必不如緩之待其彊臣爭權變難必起然後命將出師可以兵不疲勞坐收淮北也魏主曰劉裕乘姚興之死而滅之今我乘裕喪而伐之何爲不可浩曰不然姚興死諸子交爭故裕乘釁伐之今江南無釁不可比也魏主不從假司空奚斤節加晉兵大將軍行揚州刺史使督宋兵將軍交州刺史周幾吳兵將軍廣州刺史公孫表同入寇冬十月魏軍將發公卿集議於監國之前以先攻城與先略地奚斤欲先攻城崔浩曰南人長於守城昔苻氏攻襄陽經年不

拔今以大兵坐攻小城若不時克挫傷軍勢敵得徐嚴而來我怠彼銳此危道也不如分軍略地至淮爲限列置守宰收斂租穀則洛陽滑臺虎牢更在軍北絕望南救必沿河東走不則爲囿中之物何憂其不獲也公孫表固請攻城魏主從之於是奚斤等帥步騎二萬濟河營於滑臺之東時司州刺史毛德祖戍虎牢東郡太守王景度告急於德祖德祖遣司馬翟廣等將步騎三千救之先是司馬楚之聚眾在陳畱之境聞魏兵濟河遣使迎降魏以楚之爲征南將軍荊州刺史使侵擾北境德祖遣長社令王法政將五

百人戍邵陵將軍劉憐將二百騎戍雍丘以備之楚之引兵襲憐不克會臺送軍資憐出迎之酸棗民王玉馳以告魏丁酉魏尙書滑稽引兵襲倉垣兵吏悉踰城走陳畱太守馮翊嚴稜詣斤降魏以王玉爲陳畱太守給兵守倉垣奚斤等攻滑臺不拔求益兵魏主怒切責之壬辰自將諸國兵五萬餘人南出天關踰恒嶺爲斤等聲援十一月魏太子燾將兵出屯塞上使安定王彌與安同居守庚戌奚斤等急攻滑臺拔之王景度出走司馬陽瓚爲魏所執不降而死魏主以成臯侯苟兒爲兖州刺史鎮滑臺斤等進擊

翟廣等於土樓破之乘勝進逼虎牢毛德祖與戰屢破之魏主別遣黑稍將軍于栗磾將三千人屯河陽謀取金墉德祖遣振威將軍竇晃等緣河拒之十二月丙戌魏主至冀州遣楚兵將軍徐州刺史叔孫建將兵自平原濟河徇青兗豫州刺史劉粹遣治中高道瑾將步騎五百據項城徐州刺史王仲德將兵屯湖陸于栗磾濟河與奚斤并力攻竇晃等破之魏主遣中領軍代人娥清期思侯柔然閭大肥將兵七千人會周幾叔孫建南渡河軍於碯礮癸未兗州刺史徐琰棄尹卯南走於是泰山高平金鄉等郡皆沒於

魏叔孫建等東入青州司馬愛之季之先聚眾於濟東皆降於魏戊子魏兵逼虎牢青州刺史東筦竺夔鎮東陽城遣使告急己丑詔南兖州刺史檀道濟監征討諸軍事與王仲德共救之廬陵王義真遣龍驤將軍沈叔狸將三千人就劉粹量宜赴援

營陽王景平元年春正月魏于栗磾攻金墉癸卯河南太守王涓之棄城走魏主以栗磾爲豫州刺史鎮洛陽 庚申檀道濟軍於彭城魏叔孫建入臨淄所向城邑皆潰竺夔聚民保東陽城其不入城者使各依據山險芟夷禾稼魏軍至無所得食濟南太守垣

苗帥眾依夔刁雍見魏主於鄴魏主曰叔孫建等入青州民皆藏避攻城不下彼素服卿威信今遣卿助之乃以雍爲青州刺史給雍騎使行募兵以取青州魏兵濟河向青州者凡六萬騎刁雍募兵得五千人撫慰士民皆送租供軍三月魏奚斤公孫表等共攻虎牢魏主自鄴遣兵助之毛德祖於城內穴地入七丈分爲六道出魏圍外募敢死之士四百人使參軍范道基等帥之從穴中出掩襲其後魏兵驚擾斬首數百級焚其攻具而還魏兵雖退散隨復更合攻之益急奚斤自虎牢將步騎三千攻潁川太守李元

德等於許昌元德等敗走魏以潁川人庾龍爲潁川
太守戍許昌毛德祖出兵與公孫表大戰從朝至晡
殺魏兵數百會奚斤自許昌還合擊德祖大破之亡
甲士千餘人復嬰城自守魏主又遣萬餘人從白沙
渡河屯濮陽南朝議以項城去魏不遠非輕軍所抗
使劉粹召高道瑾還壽陽若沈叔狸已進亦宜且退
粹奏虜攻虎牢未復南向若遽攝軍捨項城則淮西
諸郡無所憑依沈叔狸已頓肥口又不宜遽退時李
元德帥散卒二百至項劉粹使助高道瑾戍守請宥
其犇敗之罪朝議並許之乙巳魏主畋於韓陵山遂

如汲郡至枋頭初毛德祖在北與公孫表有舊表有權略德祖患之乃與交通音問密遣人說奚斤云表與之連謀每答表書輒多所治定表以書示斤斤疑之以告魏主先是表與太史令王亮少同營署好輕侮亮亮奏表置軍虎牢東不得便地故令賊不時滅魏主素好術數以爲然積前後忿使人夜就帳中縊殺之乙卯魏主濟自靈昌津遂如東郡陳畱叔孫建將三萬騎逼東陽城城中文武纔一千五百人竺夔垣苗悉力固守時出奇兵擊魏破之魏步騎繞城列陳十餘里大治攻具夔作四重塹魏人填其三重爲

撞車以攻城夔遣人從地道中出以大麻絙挽之令折魏人復作長圍進攻逾急歷時浸久城轉墮壞戰士多死傷餘眾困乏旦暮且陷檀道濟至彭城以司青二州並急而所領兵少不足分赴青州道近竺夔兵弱乃與王仲德兼行先救之甲子劉粹遣李元德襲許昌斬庾龍元德因畱綏撫并上租糧魏主至盟津于栗磾造浮橋於冶阪津乙丑魏主引兵北濟西如河內娥清周幾閭大肥徇地至湖陸高平民屯聚而射之清等盡攻破高平諸縣滅數千家虜掠萬餘口兗州刺史鄭順之戍湖陸以兵少不敢出魏主又

遣并州刺史伊樓拔助奚斤攻虎牢毛德祖隨方抗
拒頗殺魏兵而將士稍零落夏四月丁卯魏主如成
皐絕虎牢汲河之路停三日自督眾攻城竟不能下
遂如洛陽觀石經遣使祀嵩高叔孫建攻東陽墮其
北城三十許步刁雍請速入建不許遂不克及聞檀
道濟等將至雍又謂建曰賊畏官軍突騎以鎖連車
爲函陳大峴以南處處狹隘車不得方軌雍請將所
募兵五千據險以邀之破之必矣時天暑魏軍多疫
建曰兵人疫病過半若相持不休兵自死盡何須復
戰今全軍而返計之上也已巳道濟軍於臨朐壬申

建等燒營及器械而遁道濟至東陽糧盡不能追竺
夔以東陽城壞不可守移鎮不其城叔孫建自東陽
趨滑臺道濟分遣王仲德向尹卯道濟停軍湖陸仲
德未至尹卯聞魏兵已遠還就道濟刁雍遂畱鎮尹
卯招集譙梁彭沛民五千餘家置二十七營以領之
閏四月丁未魏主如河內登太行至高都叔孫建
自滑臺西就奚斤共攻虎牢虎牢被圍二百日無日
不戰勁兵戰死殆盡而魏增兵轉多魏人毀其外城
毛德祖於其內更築三重城以拒之魏人又毀其二
重德祖唯保一城晝夜相拒將士眼皆生創德祖撫

之以恩終無離心時檀道濟軍湖陸劉粹軍項城沈叔狸軍高橋皆畏魏兵彊不敢進丁巳魏人作地道以洩虎牢城中井井深四十丈山勢峻峭不可得防城中人馬渴乏被創者不復出血重以飢疫魏仍急攻之己未城陷將士欲扶德祖出走德祖曰我誓與此城俱斃義不使城亡而身存也魏主命將士得德祖者必生致之將軍代人豆代田執德祖以獻將佐在城中者皆爲魏所虜唯參軍范道基將二百人突圍南還魏士卒疫死者亦什二三奚斤等悉定司充豫諸郡縣置守宰以撫之魏主命周幾鎮河南河南

人安之徐羨之傅亮謝晦以亡失境土上表自劾詔
勿問 五月魏主還平城 秋九月乙亥魏主還宮
召奚斤還平城畱兵守虎牢使娥清周幾鎮枋頭以
司馬楚之所將戶口置汝南南陽南頓新蔡四郡以
益豫州 冬十一月魏周幾寇許昌許昌潰潁川太
守李元德犇項戊辰魏人圍汝陽汝陽太守王公度
亦犇項劉粹遣其將姚聳夫等將兵助守項城魏人
夷許昌城毀鍾城以立封疆而還

張溥曰宋高祖殂魏主議取洛陽虎牢滑臺崔
浩固諫文帝元嘉二十九年魏宗愛弑太武帝

更謀北伐何偃止之旣師出皆無功信哉乘人之危迫人於險中國不能得志於夷狄夷狄不能得志於中國一也晉文公卒將殯曲沃秦穆公潛師軼之蹇叔哭而送其子後有崤之敗伐喪不仁自古記之崔浩勸魏主弔祭宋祖存孤恤災使義聲布天下江南不攻自服雖明世變識時務亦據經行仁之篤論也魯肅輔孫權議絕曹操而與蜀和王猛相苻堅臨終戒無伐晉賢者在人國不愛小義不就小名所持者天下之是萬世之安而已矣肅不事漢而事權猛不

事晉而事堅適當其會爲知己用耳江漢朝宗
天王河陽未嘗一日忘也崔浩智同子房臣於
佛狸伐宋之役每進格論義存止戈其亦心魯
肅王猛之心乎竺夔保東陽叔孫建攻之不下
奚斤等環圍虎牢毛德祖誓以死守宋雖挫折
魏亦殺傷攻城不如略地浩言中矣毛德祖患
公孫表權略縱反間於奚斤魏主殺表後文帝
以其術間王慧龍主弗問也勞以璽書間術之
難行也一而疑再而不信君子以是益悲范增
之不遇也

通鑑紀事本末卷一百十

通鑑紀事本末卷一百十一

宋而建安袁自樞編輯

明史太倉張太溥論

徐傅廢立

宋高祖永初元年秋八月癸酉立王太子義符爲皇太子

三年春三月上不豫太尉長沙王道憐司空徐羨之
尚書僕射傅亮領軍將軍謝晦護軍將軍檀道濟並
入侍醫藥羣臣請祈禱神祇上不許唯使侍中謝方
明以疾告宗廟而已上性不信奇怪微時多符瑞及

貴史官審以所聞上拒而不答檀道濟出爲鎮北將軍南兖州刺史鎮廣陵悉監淮南諸軍皇太子多狎羣小謝晦言於上曰陛下春秋旣高宜思存萬世神器至重不可使負荷非才上曰廬陵何如晦曰臣請觀焉出造廬陵王義真義真盛欲與談晦不甚答晦還曰德輕於才非人主也丁未出義真爲都督南豫豫雍司秦并六州諸軍事車騎將軍開府儀同三司南豫州刺史 五月帝疾甚召太子誠之曰檀道濟雖有幹略而無遠志非如兄韶有難御之氣也徐羨之傅亮當無異圖謝晦數從征伐頗識機變若有同

異必此人也又爲手詔曰後世若有幼主朝事一委宰相母后不煩臨朝司空徐羨之中書令傅亮領軍將軍謝晦鎮北將軍檀道濟同被顧命癸亥帝殂於西殿太子卽皇帝位年十七大赦尊皇太后曰太皇太后立妃司馬氏爲皇后

文帝元嘉元年營陽王居喪無禮好與左右狎暱遊戲無度特進致仕范泰上封事曰伏聞陛下時在後園頗習武備鼓鞀在宮聲聞於外黷武掖庭之內諠譁省闈之間非徒不足以威四夷祗生遠近之怪陛下踐祚委政宰臣實同高宗諒闇之美而更親狎小

人懼非社稷至計經世之道也不聽南豫州刺史廬陵王義真警悟愛文義而性輕易與太子左衛率謝靈運員外常侍顏延之慧琳道人情好款密嘗云得志之日以靈運延之爲宰相慧琳爲西豫州都督靈運性褊傲不遵法度自負才能宜參權要嘗懷憤邑延之嗜酒放縱徐羨之等惡義真與靈運等遊於是羨之等以爲靈運延之構扇異同非毀執政出靈運爲永嘉太守延之爲始安太守義真至歷陽多所求索執政每裁量不盡與義真深怨之數有不平之言又表求還都諮議參軍何尚之屢諫不聽時羨之等

已密謀廢帝而次立者應在義真乃因義真與帝有隙先奏列其罪惡廢爲庶人徙新安郡前吉陽令堂邑張約之上疏曰廬陵王少蒙先皇優慈之遇長受陛下睦愛之恩故在心必言所懷必亮容犯臣子之道致招驕恣之愆至於天姿夙成實有卓然之美宜在容養錄善掩瑕訓盡義方進退以漸今猥加剝辱幽徙遠郡上傷陛下棠棣之篤下令遠近恇然失圖臣伏思大宋開基造次根條未繁宜廣樹藩戚敦睦以道人誰無過貴能自新以武皇之愛子陛下之懿弟豈可以其一眚長致淪棄哉書奏以約之爲梁州

府參軍尋殺之夏四月徐羨之等以南兖州刺史檀道濟先朝舊將威服殿省且有兵眾乃召道濟及江州刺史王弘入朝五月皆至建康以廢立之謀告之甲申謝晦以領軍府屋敗悉令家人出外聚將士於府內又使中書舍人邢安泰潘盛爲內應夜邀檀道濟同宿將竦動不得眠道濟就寢便熟晦以此服之時帝於華林園爲列肆親自沽賣又與左右引船爲樂夕遊天淵池卽龍舟而寢乙酉詰旦道濟引兵居前羨之等繼其後入白雲龍門安泰等先誠宿衛莫有禦者帝未興軍士進殺二侍者傷帝指扶出東閤

收璽綬羣臣拜辭衛送故太子宮侍中程道惠勸羨之等立皇弟南豫州刺史義恭羨之等以宜都王義隆素有令望又多符瑞乃稱皇太后令數帝過惡廢爲營陽王以宜都王纂承大統赦死罪以下又稱皇太后令奉還璽綬并廢皇后爲營陽王妃遷營陽王於吳使檀道濟入守朝堂王至吳止金昌亭六月癸丑羨之等使邢安泰就弑之王多力突走出昌門追者以門關踣而弑之

裴子野曰古者人君養子能言而師授之辭能行而傅相之禮宋之教誨雅異於斯居中則任僕

妾處外則近趨走太子皇子有帥有侍是二職者
皆臺阜也制其行止授其法則導達臧否罔弗由
之言不及於禮義識不達於今古謹敕者能勸之
以吝嗇狂愚者或誘之以凶慝雖有師傅多以耆
艾大夫爲之雖有友及文學多以膏粱年少爲之
具位而已亦弗與遊幼王臨州長史行事宣傳教
命又有典籤往往專恣竊弄威權是以本根雖茂
而端良甚寡嗣君冲幼世繼姦回雖惡物醜類天
然自出然習則生常其流遠矣降及太宗舉天下
而棄之亦昵比之爲也嗚呼有國有家其鑑之矣

傅亮帥行臺百官奉法駕迎宜都王於江陵祠部尙書蔡廓至尋陽遇疾不堪前亮與之別廓曰營陽在吳宜厚加供奉一旦不幸卿諸人有弑主之名欲立於世將可得邪時亮已與羨之議害營陽王乃馳信止之不及羨之太怒曰與人共計議如何旋背卽賣惡於人邪羨之等又遣使者殺前廬陵王義真於新安羨之以荊州地重恐宜都王至或別用人乃亟以錄命除領軍將軍謝晦行都督荆湘等七州諸軍事荊州刺史欲令居外爲援精兵舊將悉以配之秋七月行臺至江陵立行門於城南題曰大司馬門傅亮

帥百僚詣門上表進璽紱儀物甚盛宜都王時年十八下教曰猥以不德謬降大命顧己兢悸何以克堪輒當暫歸朝廷展哀陵寢并與賢彥申寫所懷望體其心勿爲辭責府州佐史並稱臣請題榜諸門一依宮省王皆不許教州府國綱紀宥所統內見刑原逋責諸將佐聞營陽廬陵王死皆以爲疑勸王不可東下司馬王華曰先帝有大功於天下四海所服雖嗣主不綱人望未改徐羨之中才寒士傅亮布衣諸生非有晉宣帝王大將軍之心明矣受寄崇重未容遽敢背德畏廬陵嚴斷將來必不自容以殿下寬叡慈

仁遠近所知且越次奉迎冀以見德悠悠之論殆必不然又羨之等五人同功並位孰肯相讓就懷不軌勢必不行廢主若存慮其將來受禍致此殺害蓋由貪生過深寧敢一朝頓懷逆志不過欲握權自固以少主仰待耳殿下但當長驅六轡以副天人心王曰卿復欲爲宋昌邪長史王曇首南蠻校尉到彥之皆勸王行曇首仍陳天人符應王乃曰諸公受遺不容背義且勞臣舊將內外充滿今兵力又足以制物夫何所疑乃命王華總後任畱鎮荊州王欲使到彥之將兵前驅彥之曰了彼不反便應朝服順流若使

有虞此師旣不足恃更開嫌隙之端非所以副遠邇
之望也會雍州刺史褚叔度卒乃遣彥之權鎮襄陽
甲戌王發江陵引見傅亮號泣哀動左右旣而問義
真及少帝薨廢本末悲哭嗚咽侍側者莫能仰視亮
流汗沾背不能對乃布腹心於到彥之王華等深自
結納王以府州文武嚴兵自衛臺所遣百官眾力不
得近部伍中兵參軍朱容子抱刀處王所乘舟戶外
不解帶者累旬 八月丙申宜都王至建康羣臣迎
拜於新亭徐羨之問傅亮曰王可方誰亮曰晉文景
以上人羨之曰必能明我赤心亮曰不然丁酉王謁

初寧陵還止中堂百官奉璽綬王辭讓數四乃受之
卽皇帝位於中堂備法駕入宮御太極前殿大赦改
元文武賜位二等戊戌謁太廟詔復廬陵王先封迎
其柩及孫脩華謝妃還建康庚子以行荊州刺史謝
晦爲眞晦將行與蔡廓別屏人問曰吾其免乎廓曰
卿受先帝顧命任以社稷廢昏立明義無不可但殺
人二兄而以之北面挾震主之威據上流之重以古
推今自免爲難晦始懼不得去旣發顧望石頭城喜
曰今得脫矣癸卯徐羨之進位司徒王弘進位司空
傅亮加開府儀同三司謝晦進號衛將軍檀道濟進

號征北將軍有司奏車駕依故事臨華林園聽訟詔
曰政刑多所未悉可如先者二公推訊帝以王曇首
王華為侍中曇首領右衛將軍華領驍騎將軍朱容
子爲右軍將軍甲辰徐羨之等欲卽以到彥之爲雍
州帝不許徵彥之爲中領軍委以戎政彥之自襄陽
南下謝晦已至鎮慮彥之不過已彥之至楊口步往
江陵深布誠款晦亦厚自結納彥之畱馬及利劍名
刀以與晦晦由此太安

二年春正月徐羨之傅亮上表歸政表三上帝乃許
之丙寅始親萬機羨之仍遜位還第徐佩之程道惠

及吳興太守王韶之等並謂非宜敦勸甚苦乃復奉
詔視事 秋八月王弘自以始不預定策不受司空
表讓彌年乃許之 冬十一月初會稽孔甯子爲帝
鎮西諮議參軍及卽位以甯子爲步兵校尉與侍中
王華並有富貴之願疾徐羨之傅亮專權日夜構之
於帝會謝晦二女當適彭城王義康新野侯義賓遣
其妻曹氏及長子世休送女至建康帝欲誅羨之亮
并發兵討晦聲言當伐魏取河南又言拜京陵治行
裝艦亮與晦書曰薄伐河朔事猶未已朝野之慮憂
懼者多又言朝士多諫北征上當遣外監萬幼宗往

相諮訪時朝廷處分異常其謀頗泄

三年春正月謝晦弟黃門侍郎暉馳使告晦晦猶謂不然以傅亮書示諮議參軍何承天曰計幼宗一二日必至傅公慮我好事故先遣此書承天曰外間所聞咸謂西討已定幼宗豈有上理晦尙謂虛妄使承天豫立答詔啟草言伐虜宜須明年江夏內史程道惠得尋陽人書言朝廷將有大處分其事已審使其輔國府中兵參軍樂罔封以示晦晦問承天曰若果爾卿令我云何對曰蒙將軍殊顧常思報德事變至矣何敢隱情然明日戒嚴動用軍法區區所懷懼不

得盡晦懼曰卿豈欲我自裁邪承天曰尙未至此以王者之重舉天下以攻一州大小旣殊逆順又異境外求全上計也其次以腹心將兵屯義陽將軍自帥大眾戰於夏口若敗卽趨義陽以出北境其次也晦良久曰荊州用武之地兵糧易給聊且決戰走復何晚乃使承天造立表檄又與衛軍諮議參軍琅邪顏邵謀舉兵邵飲藥而死晦立幡戒嚴謂司馬庾登之曰今當自下欲屈卿以三千人守城備禦劉粹登之曰下官親老在都又素無部眾情計二三不敢受此言晦仍問諸將佐戰士三千足守城否南蠻司馬周

超對曰非徒守城而已若有外寇可以立功登之因
曰超必能辦下官請解司馬南郡以授之晦卽於坐
命超爲司馬領南義陽太守轉登之爲長史南郡如
故帝以王弘檀道濟始不預廢弑之謀弘弟曇首又
爲帝所親委事將發密使報弘且召道濟欲使討晦
王華等皆以爲不可帝曰道濟止於脅從本非創謀
殺害之事又所不關吾撫而使之必將無慮乙丑道
濟至建康丙寅下詔暴羨之亮晦殺營陽王廬陵王
之罪命有司誅之且曰晦據有上流或不卽罪朕當
親帥六師爲其過防可遣中領軍到彥之卽日電發

征北將軍檀道濟駱驛繼路符衛軍府州以時收剪
已命雍州刺史劉粹等斷其走伏罪止元凶餘無所
問是日詔召羨之亮羨之行至西明門外謝朐正直
遣報亮云殿內有異處分亮辭以嫂病暫還遣信報
羨之羨之還西州乘內人問訊車出郭步走至新林
入陶竈中自經死亮乘車出郭門乘馬犇兄迪墓屯
騎校尉郭泓收之至廣莫門上遣中書舍人以詔書
示亮并謂曰以公江陵之誠當使諸子無恙亮讀詔
書訖曰亮受先帝布衣之眷遂蒙顧託黜昏立明社
稷之計也欲加之罪其無辭乎於是誅亮而徙其妻

子於建安誅羨之二子而宥其兒子珮之又誅晦子世休收繫謝朐帝將討謝晦問策於檀道濟對曰臣昔與晦同從北征入關十策晦有其九才略明練殆爲少敵然未嘗孤軍決勝戎事恐非其長臣悉晦智晦悉臣勇今奉王命以討之可未陳而擒也丁卯徵王弘爲侍中司徒錄尚書事揚州刺史以彭城王義康爲都督荆湘等八州諸軍事荊州刺史樂岡復遣使告謝晦以徐傅及朐等已誅晦先舉羨之亮哀次發子弟凶問旣而自出射堂勒兵晦從高祖征討指麾處分莫不曲盡其宜數日間四遠投集得精兵三

萬人乃奉表稱羨之亮等忠貞橫被冤酷且言臣等若志欲執權不專爲國初廢營陽陛下在遠武皇之子尙有童幼擁以號令誰敢非之豈得泝流三千里虛館七旬仰望鸞旗者哉故廬陵王於營陽之世積怨犯上自貽非命不有所廢將何以興耿弇不以賊遺君父臣亦何負於宋室邪此皆王弘王曇首王華險躁猜忌讒構成禍今當舉兵以除君側之惡帝下詔戒嚴大赦諸軍相次進路以討謝晦晦以弟遜爲竟陵內史將萬人總畱任帥眾二萬發江陵列舟艦自江津至於破冢旌旗蔽日歎曰恨不得以此爲

勤王之師 二月庚申上發建康命王弘與彭城王
義康居守入居中書下省侍中殷景仁參掌畱任帝
姊會稽長公主畱止臺內總攝六宮謝晦自江陵東
下何承天畱府不從晦至江口到彥之已至彭城洲
庾登之據巴陵畏懦不敢進會霖雨連日參軍劉和
之曰彼此共有兩耳檀征北尋至東軍方彊唯宜速
戰登之恇怯使小將陳祐作大囊貯茅懸於帆檣云
可以焚艦用火宜須晴以緩戰期晦然之停軍十五
日乃使中兵參軍孔延秀攻將軍蕭欣於彭城洲破
之又攻洲口柵陷之諸將咸欲退還夏口到彥之不

可乃保隱圻晦又上表自訟且自矜其捷曰陛下若
梟四凶於廟庭懸三監於絳闕臣便勒眾旋旗還保
所任初晦與徐羨之傅亮爲自全之計以爲晦據上
流而檀道濟鎮廣陵各有強兵足以制朝廷羨之亮
居中秉權可得持久及聞道濟帥眾來晦惶懼無計
道濟旣至與到彥之軍合牽艦緣岸晦始見艦數不
多輕之不卽出戰至晚因風帆上前後連咽西人離
沮無復鬪心戊辰臺軍至忌置洲尾列艦過江晦軍
一時皆潰晦夜出投巴陵得小船還江陵先是帝遣
雍州刺史劉粹自陸道帥步騎襲江陵至沙橋周超

帥萬餘人逆戰大破之士眾傷死者過半俄而晦敗聞至初晦與粹善以粹子曠之爲參軍帝疑之王弘曰粹無私必無憂也及受命南討一無所顧帝以此嘉之晦亦不殺曠之遣還粹所丙子帝自蕪湖東還晦至江陵無它處分唯愧謝周超而已其夜超捨軍單舸詣到彥之降晦眾散略盡乃攜其弟遯等七騎北走遯肥壯不能乘馬晦每待之行不得速己卯至安陸延頭爲戍主光順之所執檻送建康到彥之至馬頭何承天自歸彥之因監荊州府事以周超爲參軍劉粹以沙橋之敗告乃執之於是誅晦矚遯及其

兄弟之子并同黨孔延秀周超等晦女彭城王妃被
髮徒跣與晦訣曰大丈夫當橫尸戰場奈何狼籍都
市庾登之以無任免官禁錮何承天及南蠻行參軍
新興王玄謨等皆見原三月辛巳帝還建康徵謝靈
運爲祕書監顏延之爲中書侍郎賞遇甚厚夏五
月乙未以檀道濟爲征南大將軍開府儀同三司江
州刺史到彥之爲南豫州刺史

張溥曰宋武年踰不惑始生少帝晚而有子愛
且過甚遂至失教敗德臨喪不哀遨戲無度徐
羨之傅亮謝晦與檀道濟同被顧命憂念國家

計圖黜昏於是少帝夕寢龍舟朝出東閣跡雖不順非得已也然必使邢安泰弑之悖矣羨之等謀廢少帝復惡義真當次先列其罪徙降庶人少帝旣弑禍心未已又殺義真武皇陵土未乾二子相繼勦戮伊尹桐宮豈若是乎傅亮迎文帝東下引見之日帝問義真少帝薨廢本末悲號嗚咽亮卽自度不免晉大夫里克殺奚齊卓子納晉惠公惠公殺之謂其難乎爲君羨之等罪不啻克三年始死伏劍已晚史言亮畏世路屯險著演愼論少帝失德感蛾成賦初奉大

駕道路賦詩言有懼心旣知傾覆無由求退作
辛有穆生諸贊稱其見微卽彼知幾寧讓傅迪
然有君而賊之君可無死而死之其臣實甚於
上何尤古者危篡之臣篡成則王不成則族舉
事之始非不日與死鄰也明知必死故一爲之
冀其或成是以布衣卿相萌僥倖之心少主鍾
簋罹塗炭之厄李斯不斬咸陽不思上蔡凡人
寵極而危者皆然其身爲弑而欲以功名終者
尤未聞也謝世基與晦同死臨刑爲連句詩有
橫海垂天之悲晦續以保退無力太行難陟不

怨身謀而傷世俗亦文人自文其愚也

通鑑紀事本末卷一百十一

通鑑紀事本末卷一百十二

宋建安袁樞編輯

明太倉張溥論正

彭城王專政

宋高祖永初元年夏六月立皇子義康爲彭城王
文帝元嘉五年春正月荊州刺史彭城王義康性聰
察在州職事脩治左光祿大夫范泰謂司徒王弘曰
天下事重權要難居卿兄弟盛滿當深存降挹彭城
王帝之次弟宜徵還入朝共參朝政弘納其言時大
旱疾疫弘上表引咎遜位帝不許

六年春正月王弘上表乞解州錄以授彭城王義康
帝優詔不許癸丑以義康爲侍中都督揚南徐兗三
州諸軍事司徒錄尚書事領南徐州刺史弘與義康
二府並置佐領兵共輔朝政弘旣多疾且欲委遠大
權每事推讓義康由是義康專總內外之務

七年彭城王義康與王弘並錄尚書義康意猶怏怏
欲得揚州形於辭旨以弘弟曇首居中爲上所親委
愈不悅弘以老病屢乞骸骨曇首自求吳郡上皆不
許義康謂人曰王公久病不起神州詎宜臥治曇首
勸弘減府中文武之半以授義康上聽割二千人義

康乃悅

九年夏六月戊寅司徒南徐州刺史彭城王義康改領揚州刺史

十二年春三月領軍將軍劉湛與僕射殷景仁素善湛之入也景仁實引之湛既至以景仁位遇本不踰己而一旦居前意甚憤憤俱被時遇以景仁專管內任謂爲閒已猜隙漸生知帝信仗景仁不可移奪時司徒義康專秉朝權湛嘗爲義康上佐遂委心白結欲因宰相之力以回上意傾黜景仁獨當時務夏四月己巳帝加景仁中書令中護軍卽家爲府湛加太

子詹事湛愈憤怒使義康毀景仁於帝帝遇之益隆
景仁對親舊歎曰引之令入入便噬人乃稱疾解職
表疏累上帝不許使停家養病湛議遣人若劫盜者
於外殺之以爲帝雖知當有以解之不能傷義康至
親之愛帝微聞之遷護軍府於西掖門外使近宮禁
故湛謀不行義康僚屬及諸附麗湛者潛相約勒無
敢歷殷氏之門彭城王主簿沛郡劉敬文父成未悟
其機詣景仁求郡敬文遽往謝湛曰老父悖耄遂就
殷鐵干祿由敬文闇淺上負生成闔門慙懼無地自
處唯後將軍司馬庾炳之遊二人之間皆得其歡心

而密輸忠於朝廷景仁臥家不朝謁帝常使炳之銜命往來湛不疑也炳之登之之弟也

十三年春二月司空江州刺史永脩公檀道濟立功前朝威名甚重左右腹心並經百戰諸子又有才氣朝廷疑畏之帝久疾不愈劉湛說司徒義康以爲宮車一日晏駕道濟不復可制會帝疾篤義康言於帝召道濟入朝其妻向氏謂道濟曰高世之勳自古所忌今無事相召禍其至矣旣至畱之累月帝稍間將遣還已下渚未發會帝疾動義康矯詔召道濟入祖道因執之三月己未下詔稱道濟潛散金貨招誘剽

猗因朕寢疾規肆禍心收付廷尉并其子給事黃門侍郎植等十一人誅之唯宥其孫孺又殺司空參軍薛彤高進之二人皆道濟腹心有勇力時人比之關張道濟見收憤怒目光如炬脫幘投地曰乃壞汝萬里長城魏人聞之喜曰道濟死吳子輩不足復憚庚申大赦以中軍將軍南譙王義宣爲江州刺史

十六年春正月庚寅司徒義康進位大將軍領司徒南兖州刺史江夏王義恭進位司空

十七年司徒義康專總朝權上羸疾積年心勞輒發屢至危殆義康盡心營奉藥食非口所親嘗不進

或連夕不寐內外眾事皆專決施行性好吏職糾剔文案莫不精盡上由是多委以事凡所陳奏入無不可方伯以下並令義康選用生殺大事或以錄命斷之勢傾遠近朝野輻湊每旦府門常有車數百乘義康傾身引接未嘗懈倦復能彊記耳目所經終身不忘好於稠人廣席標題所憶以示聰明士之幹練者多被意遇嘗謂劉湛曰王敬弘王球之屬竟何所堪坐取富貴復那可解然素無學術不識大體朝士有才用者皆引入己府府僚無施及忤旨者乃斥爲臺官自謂兄弟至親不復存君臣形迹率心而行曾無

猜防私置僮六千餘人不以言臺四方獻饋皆以上品薦義康而以次者供御上嘗冬月噉甘歎其形味並劣義康曰今年甘殊有佳者遣人還東府取甘大供御者三寸領軍劉湛與僕射殷景仁有隙湛欲倚義康之重以傾之義康權勢已盛湛愈推崇之無復人臣之禮上浸不能平湛初入朝上恩禮甚厚湛善論治道諳前代故事敘致銓理聽者忘疲每入雲龍門御者卽解駕左右及羽儀隨意分散不夕不出以此爲常及晚節驅扇義康上意雖內離而接遇不改嘗謂所親曰劉班初自西還宮與語嘗視日早晚慮

其將去比入吾亦視日早晚苦其不去殷景仁密言於上曰相王權重非社稷計宜少加裁抑上陰然之司徒左長史劉斌湛之宗也大將軍從事中郎王履謐之孫也及主簿劉敬文祭酒魯郡孔肩秀皆以傾諂有寵於義康見上多疾皆謂宮車一日晏駕宜立長君上嘗疾篤使義康具顧命詔義康還省流涕以告湛及景仁湛曰天下艱難詎是幼主所御義康景仁並不答而肩秀等輒就尙書儀曹索晉咸康末立康帝舊事義康不知也及上疾瘳微聞之而斌等密謀欲使大業終歸義康遂邀結朋黨伺察禁省有不

與已同者必百方構陷之又採拾景仁短長或虛造異同以告湛自是主相之勢分矣義康欲以劉斌爲丹楊尹言次啟上陳其家貧言未卒上曰以爲吳郡後會稽太守羊玄保求還義康又欲以斌代之啟上曰羊玄保求還不審以誰爲會稽上時未有所擬倉猝曰我已用王鴻自去年秋上不復往東府五月癸巳劉湛遭母憂去職湛自知罪釁已彰無復全地謂所親曰今年必敗常曰正賴口舌爭之故得推遷耳今旣窮毒無復此望禍至其能久乎上以司徒彭城王義康嫌隙已著將成禍亂冬十月戊申收劉湛

付廷尉下詔暴其罪惡就獄誅之并誅其子黯亮儼
及其黨劉斌劉敬文孔胤秀等八人徙尙書庫部郎
何默子等五人於廣州因大赦是日勅義康入宿畱
止中書省其夕分收湛等青州刺史杜驥勒兵殿內
以備非常遣人宣旨告義康以湛等罪狀義康上表
遜位詔以義康爲江州刺史侍中大將軍如故出鎮
豫章初殷景仁臥疾五年雖不見上而密函去來日
以十數朝政大小必以咨之影迹周密莫有窺其際
者收湛之日景仁使拂拭衣冠左右皆不曉其意其
夜上出華林園延賢堂召景仁景仁猶稱腳疾以小

牀輿就坐誅討處分一皆委之初檀道濟薦吳興沈慶之忠謹曉兵上使領隊防東掖門劉湛爲領軍嘗謂之曰卿在省歲久比當相論慶之正色曰下官在省十年自應得轉不復以此仰累收湛之夕上開門召慶之慶之戎服縛袴而入上曰卿何意乃爾急裝慶之曰夜半喚隊主不容緩服上遣慶之收劉斌殺之驍騎將軍徐湛之達之之子也與義康尤親厚上深銜之義康敗湛之被收罪當死其母會稽公主於兄弟爲長嫡素爲上所禮家事大小必咨而後行高祖微時嘗自於新洲伐荻有納布衫襖臧皇后手所

作也既貴以付公主曰後世有驕奢不節者可以此
衣示之至是公主入宮見上號哭不復施臣妾之禮
以錦囊盛納衣擲地曰汝家本貧賤此是我母與汝
父所作今日得一飽餐遽欲殺我兒邪上乃赦之吏
部尚書王球履之叔父也以簡淡有美名爲上所重
履性進利深結義康及湛球屢戒之不從誅湛之夕
履徒跣告球球命左右爲取履先溫酒與之謂曰常
日語汝云何履怖懼不得答球徐曰阿父在汝亦何
憂上以球故履得免死廢於家義康方用事人爭求
親暱唯司徒主簿江湛早能自疎求出爲武陵內史

檀道濟嘗爲其子求婚於湛湛固辭道濟因義康以請之湛拒之愈堅故不染於二公之難上聞而嘉之湛夷之子也彭城王義康停省十餘日見上奉辭便下渚上唯對之慟哭餘無所言上遣沙門慧琳視之義康曰弟子有還理不慧琳曰恨公不讀數百卷書初吳興太守謝述裕之弟也累佐義康數有規益早卒義康將南歎曰昔謝述唯勸吾退劉班唯勸吾進今班存而述死其敗也宜哉上亦曰謝述若存義康必不至此以征虜司馬蕭斌爲義康諮議參軍領豫章太守事無大小皆以委之斌摹之之子也使龍驤

將軍蕭承之將兵防守義康左右愛念者並聽隨從
資奉優厚信賜相係朝廷大事皆報示之久之上就
會稽公主宴集甚懽主起再拜叩頭悲不自勝上不
曉其意自起扶之主曰車子歲暮必不爲陛下所容
今特請其命因慟哭上亦流涕指蔣山曰必無此慮
若違今誓便是負初寧陵卽封所飲酒賜義康并書
曰會稽姊飲宴憶弟所餘酒今封送故終主之身義
康得無恙

臣光曰文帝之於義康友愛之情其始非不隆也
終於失兄弟之歡虧君臣之義迹其亂階正由劉

湛權利之心無有厭已詩云貪人敗類其是之謂乎

徵南兖州刺史江夏王義恭爲司徒錄尚書事戊寅以臨川王義慶爲南兖州刺史冬十一月殷景仁旣拜揚州羸疾遂篤上爲之勅西州道上不得有車聲癸丑卒十二月癸亥以光祿大夫王球爲僕射戊辰以始興王濬爲揚州刺史時濬尙幼州事悉委後軍長史范曄主簿沈璞曄泰之子璞林子之子也曄尋遷左衛將軍以吏部郎沈演之爲右衛將軍對掌禁旅又以庾炳之爲吏部郎俱參機密演之勁之曾

孫也曄有雋才而薄情淺行數犯名教爲士流所鄙性躁競自謂才用不盡常怏怏不得志吏部尙書何尙之言於帝曰范曄志趨異常請出爲廣州刺史若在內釁成不得不加鈇鉞鈇鉞亟行非國家之美也帝曰始誅劉湛復遷范曄人將謂卿等不能容才朕信受讒言但共知其如此無能爲害也

十八年春正月彭城王義康至豫章辭刺史甲辰以義康都督江交廣三州諸軍事前龍驤參軍巴東扶令育詣闕上表稱昔袁盎諫漢文帝曰淮南王若道路遇霜露死陛下有殺弟之名文帝不用追悔無及

彭城王義康先朝之愛子陛下之次弟若有迷謬之愆正可數之以善惡道之以義方奈何信疑似之嫌一旦黜削遠送南垂草萊黔首皆爲陛下痛之廬陵往事足爲龜鑑恐義康年窮命盡奄忽於南臣雖微賤竊爲陛下羞之陛下徒知惡枝之宜伐豈知伐枝之傷樹伏願亟召義康返於京甸兄弟協和君臣輯睦則四海之望塞多言之路絕矣何必司徒公揚州牧可以置彭城王哉若臣所言於國爲非請伏重誅以謝陛下表奏卽收付建康獄賜死

裴子野曰夫在上爲善若雲行雨施萬物受其賜

及其惡也若天裂地震萬物所驚駭其誰弗知其
誰弗見豈戮一人之身鉗一夫之口所能攘逃所
能弭滅哉是皆不勝其忿怒而有增於疾疹也以
太祖之含弘尙掩耳於彭城之戮自斯以後誰易
由言有宋累葉罕聞直諒豈骨鯁之氣俗愧前古
抑時王刑政使之然乎張約隕於權臣扶育斃於
哲后宋之鼎鑊吁可畏哉

二十二年 初魯國孔熙先博學文史兼通數術有
縱橫才志爲員外散騎侍郎不爲時所知憤憤不得
志父默之爲廣州刺史以贓獲罪大將軍彭城王義

康爲救解得免及義康遷豫章熙先密懷報效且以爲天文圖讖帝必以非道晏駕由骨肉相殘江州應出天子以范曄志意不滿欲引與同謀而熙先素不爲曄所重太子中舍人謝綜曄之甥也熙先傾身事之綜引熙先與曄相識熙先家饒於財數與曄博故爲拙行以物輸之曄旣利其財又愛其文藝由是情好款洽熙先乃從容說曄曰大將軍英斷聰敏人神攸屬失職南垂天下憤怨小人受先君遺命以死報大將軍之德頃人情騷動天文舛錯此所謂時運之至不可推移者也若順天人心結英豪之士表裏

相應發於肘腋然後誅除異我崇奉明聖號令天下
誰敢不從小人請以七尺之軀三寸之舌立功立事
而歸諸吾子丈人以爲何如曄甚愕然熙先曰昔毛
玠竭節於魏武張溫畢議於孫權彼二人者皆國之
俊乂豈言行玷缺然後至於禍辱哉皆以廉直勁正
不得久容丈人之於本朝不深於二主人閒雅譽過
於兩臣讒夫側目爲日久矣比肩競逐庸可遂乎近
者殷鐵一言而劉班碎首彼豈父兄之讐百世之怨
乎所爭不過榮名勢利先後之閒耳及其末也唯恐
陷之不深發之不早戮及百口猶曰未厭是可謂寒

心悼懼豈書籍遠事也哉今建大勳奉賢哲圖難於
易以安易危享厚利收鴻名一旦苞舉而有之豈可
棄置而不取哉曄猶疑未決熙先曰又有過於此者
愚則未敢道耳曄曰何謂也熙先曰丈人奕葉清通
而不得連姻帝室人以犬豕相遇而丈人曾不恥之
欲爲之死不亦惑乎曄門無內行故熙先以此激之
曄默然不應反意乃決曄與沈演之並爲帝所知曄
先至必待演之俱入演之先至嘗獨被引曄以此爲
怨曄累經義康府佐中間獲罪於義康謝綜及父述
皆爲義康所厚綜弟約娶義康女綜爲義康記室參

軍自豫章還申義康意欲曄求解晚隙復敦往好大將軍府史仲承祖有寵於義康聞熙先有謀密相結納丹楊尹徐湛之素爲義康所愛承祖因此結事湛之告以密計道人法略尼法靜皆感義康舊恩並與熙先往來法靜妹夫許曜領隊在臺許爲內應法靜之豫章熙先付以牋書陳說圖讖於是密相署置及素所不善者並入死曰熙先又使弟休先作檄文稱賊臣趙伯符肆兵犯蹕禍流儲宰湛之曄等投命奮戈卽日斬伯符首及其黨與今遣護軍將軍臧質奉璽綬迎彭城王正位辰極熙先以爲舉大事宜須以

義康之旨諭眾曄又詐作義康與湛之書令誅君側之惡宣示同黨帝之燕武帳岡也曄等謀以其日作亂許曜侍帝扣刀目曄曄不敢仰視俄而座散徐湛之恐事不濟密以其謀白帝帝使湛之具探取本末得其檄書選署姓名上之帝乃命有司收掩窮治其夜呼曄置客省先於外收綜及熙先兄弟皆款服帝遣使詰問曄曄猶隱拒熙先聞之笑曰凡處分符檄書疏皆范所造云何於今方作如此抵蹋邪帝以曄墨迹示之乃具陳本末明日仗士送付廷尉熙先望風吐款辭氣不撓上奇其才遣人慰勉之曰以卿之

才而滯於集書省理應有異志此乃我負卿也又責
前吏部尙書何尙之曰使孔熙先年將三十作散騎
郎那不作賊熙先於獄中上書謝恩且陳圖讖深戒
上以骨肉之禍曰願且勿遺棄存之中書若囚死之
後或可追錄庶九泉之下少塞釁責曄在獄爲詩曰
雖無嵇生琴庶同夏侯色曄本意謂入獄卽死而上
窮治其獄遂經二旬曄更有生望獄吏戲之曰外傳
詹事或當長繫曄聞之驚喜綜熙先笑之曰詹事疇
昔攘袂瞋目躍馬顧盼自以爲一世之雄今擾攘紛
紜畏死乃爾設令賜以性命人臣圖主何顏可以生

存十二月乙未曄綜熙先及其子弟黨與皆伏誅曄母至市涕泣責曄以手擊曄頸曄色不忤妹及伎妾來別曄悲涕流漣綜曰舅殊不及夏侯色曄收淚而止謝約不預逆謀見兄綜與熙先遊嘗諫之曰此人輕事好奇不近於道果銳無檢未可與狎綜不從而敗綜母以子弟自蹈逆亂獨不出視曄語綜曰姊今不來勝人多矣收籍曄家樂器服玩並皆珍麗伎妾不勝珠翠母居止單陋唯有一厨盛樵薪弟子冬無被叔父單布衣

裴子野曰夫有逸羣之才必思沖天之據蓋俗之

量則積常均之下其能守之以道將之以禮殆爲
鮮乎劉弘仁范蔚宗皆忸志而貪權矜才以徇逆
累葉風素一朝而隕嚮之所謂智能翻爲亡身之
具矣

徐湛之所陳多不盡爲曄等辭所連引上赦不問臧
質熹之子也先爲徐兗二州刺史與曄厚善曄敗以
爲義興太守有司奏削彭城王義康爵收付廷尉治
罪丁酉詔免義康及其男女皆爲庶人絕屬籍徙付
安成郡以寧朔將軍沈邵爲安成相領兵防守邵璞
之兄也義康在安成讀書見淮南厲王長事廢書歎

曰自古有此我乃不知得罪爲宜也庚戌以前豫州刺史趙伯符爲護軍將軍伯符孝穆皇后之弟子也二十四年冬十月壬午胡藩之子誕世殺豫章太守桓隆之據郡反欲奉前彭城王義恭等奏彭城史檀和之去官歸過豫章擊斬之

二十八年 胡誕世之反也江夏王義恭等奏彭城王義康數有怨言搖動民聽故不逞之族因以生心請徙廣州上將徙義康先遣使語之義康曰人生會死吾豈愛生必爲亂階雖遠何益請死於此恥復屢遷竟未及往魏師至瓜步人情恐懼上慮不逞之人

復奉義康爲亂太子邵及武陵王駿尙書左僕射何
尙之屢啟宜早爲之所上乃遣中書舍人嚴龍齎藥
賜義康死義康不肯服曰佛教不許自殺願隨宜處
分使者以被拚殺之

張溥曰義康聰識過人長於政事歷方任領朝
權號稱強敏又性友悌文帝病虛勞入侍湯藥
飲食親嘗以進彌日忘寢夫以國體之材篤具
爾之戚周旋帝側內外無甚卽終身令名爲漢
東平可也廼劉湛傾危范曄造亂胡誕世弄兵
豫章奉以爲名遂至促命向者寵榮適爲禍刃

然瑕釁所出義康實不與聞人啟其隙而身當其患則謂之何劉湛爲殷景仁所引同被時遇卽傾景仁欲自專劉斌王履劉敬文孔肩秀等附麗爲羣共謀推戴凡小人日夜指天日出心腹者豈爲義康計長久哉苟幸成事取富貴足矣帝常疾篤義康流涕蹙然以幼主爲懷肩秀等卽圖訪舊事議立弟彼蓋謂介弟執政聲勢已極所不足者天子耳不知其坦懷憂思係心本朝也孔熙先感義康救父之德力懷報效嗚呼欲忠於文帝莫若勸以敦睦欲忠於義康莫

若勸以止足熙先不念張約扶令育之讜言而
計出於羊勝公孫詭何其悖也范曄酒狂善琵琶
豐伎妾薄父母門胄雖華物望不及熙先輕
屬以大事又所往來者法略道人法靜尼之徒
細人傳言妄窺禁密卽欲不敗其道無繇曄等
旣死義康益危蓋骨肉釁生事迹章著聞義康
者義康猶得誅之奉義康者義康卽不與其謀
不能百口明也豫章兵起魏師再至帝慮義康
甚於敵國掩被冤酷其何以免義康素賤文義
厭袁淑才語及徙安成讀漢書見淮南厲王長

事始廢書長歎夫處盛貴形迹之嫌居高畏託
足之眾尊親如義康猶然下者可知已

通鑑紀事本末卷一百十二

